

Dumonda Cavegn concernent la concepziun da graubündenSPORT sco uffizi da sport

Il sport ed il moviment han ina gronda impurtanza per la populaziun dal chantun Grischun. Il studi «Sport Svizra 2014» mussa che la populaziun grischuna è extraordinariamain sportiva, e quai tant en cumparegliaziun cun la Svizra tudestga sco er cumpareglià cun l'entira Svizra. La mesadad da la populaziun grischuna fa pliras giadas per emna sport e vegn uschia sin almain 3 uras activitad da sport per emna. In quart da la populaziun è activ en ina da las circa 700 uniuns da sport. Il sport è però er in factur economic impurtant en il Grischun. Occurrenz ed infrastructures da sport attractivas sustegnan la qualidad dal Grischun sco lieu da sport.

Il concept per promover il sport, ch'è vegnì approvà da la regenza ils 15 da december 2015, ha sviluppà vinavant ed optimà anc ina giada en moda decisiva la promoziun dal sport en il chantun Grischun. La gronda part da las finamiras e da las mesiras menziunadas en quest concept è realisadas en il fratemp. Restada è deplorablmain la classificaziun organisatorica da la promoziun dal sport entaifer l'administraziun chantunala. graubündenSPORT è per l'ina posiziunà vinavant sin il stgalim il pli bass da l'ierarchia chantunala e per l'autra domicilià en il sector da la scola populara.

Quest posiziunament sin il stgalim il pli bass na po betg tegnair quint da l'impurtanza pli e pli gronda dal sport en il Grischun. El sa differenziescha lura er frappantamain da la maiortad dals auters chantuns (en l'entira Svizra orientala incl. ZH e TI è la promoziun dal sport organisada en in uffizi, auter ch'en GL ed en AR). E la classificaziun dal sport en il sector da la scola populara è materialmain nunmotivada, damai che mo ina pitschna part da las incumbensas concerna il sport da scola. Ils puncts communabels cun auters secturs predomineschan cleramain (cunzunt cun il sport da dretg privat resp. cun il sport d'uniun, cun G+S sco er cun il fond da sport). Cunzunt però pudess il posiziunament sco uffizi represchentar en moda anc pli directa e pli efficazia ils interess dal sport envers auters secturs da la politica (furmaziun, planisaziun dal territori, construcziun, turissem, natira e protecziun da l'ambient). Medemamain permettes el al chantun da surpigliar vinavant activamain, ma en moda anc pli preschenta vers anora, ina rolla directiva en las debattas naziunalas da la politica da sport.

Gia oz s'engascha il chantun – cun ses team surveiaivel – en moda fitg effizienta per promover il sport. Quai na duai però betg vegnir interpretà uschia che l'uffizi fiss memia pitschen sco post da servetsch autonom. Sch'ins dirigia e coordinescha anc meglier las activitads multifaras en il sector da sport, pon ins optimar las cundiziuns generalas per las sportistas ed ils sportists da prestaziun giuvens ed intimar anc dapli glieud da far sport. En vista als avantatgs ch'il far regularmain sport ha per il bainesser persunal da la singula persuna e pia er per la societad en sia totalitad, èsi absolutamain raschunaivel ch'il chantun s'engaschia en moda pli intensiva per il sport.

Sin basa da las ponderaziuns numnadas s'impona in augment dal status da graubündenSPORT cun agid d'ina nova classificaziun ierarchica sco uffizi da sport. Quai correspunda er al giavisch dal sport grischun privat. Colliada cun quai fiss ina gronda stima dal sport, ch'avess la funcziun d'in signal correspondent per ils numerus acturs dal sport grischun ch'èn engaschads per gronda part en uffizi d'onur.

Las sutsegnadras ed ils sutsegnaders dumondan, sche la regenza è pronta da metter in segn per ina preschientscha pli intensiva dal chantun Grischun en la politica da sport ed en la publicitad, e da prender per mauns l'augment da la valur da graubündenSPORT cun stgaffir in uffizi da sport.

Cuira, ils 30 d'avust 2019

Cavegn, Michael (Donat), Geisseler, Aebli, Atanes, Berther, Bondolfi, Brunold, Buchli-Mannhart, Cahenzli-Philipp, Caluori, Cantieni, Casutt-Derungs, Caviezel (Cuira), Danuser, Della Cà, Deplazes (Rabius), Derungs, Ellemunter, Engler (Tavau Vitg), Epp, Fasani, Florin-Caluori, Flütsch, Föhn, Gasser, Kappeler, Kasper, Kohler, Kunfermann, Kuoni, Locher Benguerel, Loepfe, Maissen, Märchy-Caduff, Niggli-Mathis (Grüsch), Noi-Togni, Paterlini, Perl, Preisig, Rettich, Ruckstuhl, Rüegg, Rutishauser, Sax, Schmid, Schneider, Thür-Suter, Tomaschett (Breil), Tomaschett-Berther (Trun), Ulber, Waidacher, Wellig, Widmer-Spreiter (Cuira), Zanetti (Sent), Zanetti (Landquart), Costa, Engler (Surava), Federspiel